

Un driverwer

erscheint auf www.lenauheim.de

monatliche
Erscheinung

Februar 2019

von Helen Alba

Dorch die Hinnertier

Es Resi un de Niklos han sich vorghol, im vergangene Johr die Verwandschaft in Deutschland zu bsuche. Un des iwer die Winterfeiertäch. Die zwaa han ke Kinner ghat, doch die Gschwister, Nichte un Neffe han anghal, dass se kumme selle, dass mer mol wieder gemeinsam Weihnachte un Neijohr feire kann. Es git jo jetz ginschtichi Flüge un die Gschwister han dene zwaa angebot, e Flugticket hin un zruck zu kaafe. De Niklos war gleich derbei, es Resi hat awer gement: „Mir sin noch nie gfloo. Ob mer do zurecht kumme? Iwerhaupscht in dem riesgroße Flughafen in München?!“ Doch die Nichte Inge hat se beruhicht: „Godi, es is alles haargenau angeschrieb. Iwerall. Mer muss nor ablese un de Schilder nohgehn bis zum Ausgang. Un dorte warte mer uf Eich!“ Also han die zwaa Schwowe ingewillicht, uf Deutschland zu fliehe. Es Resi mit Herzkloppe, de Niklos voller Erwartung un Vorfreed – so sin se in Temeschwar abgfloo un ach gut in München geland. Alles war geplant, zuerscht sin se zum Resi seiner Schwester, em Mari in München. Es war vill zu verzähle, die Täch vor Weihnachte sin schnell vergang, es war vill vorzubereite, weil die ganzi Familie hat sich am Heiliche Owet beim Mari versammelt.

Zu Neijohr sin die zwaa dann uf Ulm gfiehrt gin, dorte hat em Niklos sei Bruder, de Pheder mit Familie gelebt. Sie han mitnaner Silvester gfeiert un ware richtich froh un zufriede, so scheeni Feiertäch verbrung zu han. Es Resi hat noch e weitleifichi Verwandti, sozusaan e Gschwisterferkel, es Lissi angeruft. Un des hat gement: „Ihr kennt nit eher hem reise, bis der uns nit do in Geislingen ufgsucht hat. Mir han uns seit eener Ewichkeit nimi gsiehn. Unser Roland werd Eich abholle kumme!“

So sin es Resi un de Niklos uf des Geislingen kumm. Es Lissi hat traktiert, es war grad de Dreikeenichstach. Sogar Krappe sin traditionsgemäß gebackt gin. Wies geger Owet gang is, hats Lissi anfang rum zu druckse un is endlich mit der Sproch rausgerickt: „Mir han doch nor die kleeni Wohnung mit Schlof- un Wohnzimmer. Dass mer doch e gudi Nacht verbringe kenne, han mer Eich ganz in der Näh e Hotelzimmer reserviert. Des macht Eich doch nix aus? De Roland holt Eich dort noh em Frühstück ab un fiehrt Eich uf München zum Mari“!

Dass se jetz a noch in eem Hotel schlofe were, des han es Resi un de Niklos nitemol geträämt. Wie se dann vor dem Hotel gstann han, sin es Resi un de Niklos erscht im Auto hucke geblieb, bis es Lissi gang war weger de Formalitäte halt. Un es is noh eener gudi Weil zruck kumm, hat e Schlissl in der Hand ghat un gement: „Weils schun so spot is, misse mer an der hinnituschi Tier nin gehn“! So sin se um des Hotel rum gang, sin dorch die Hinnertier nin, phaar Trappe nunerzus un ware dann vor ihrem Zimmer. Es Lissi hat des ufgsperrt, es war jo winzich kleen, doch mit zwaa Better, eem Tisch un Stuhl sowie WC un Dusche. Sie han sich vunenaner verabschied un der Nachtruhe hat nix mehr im Wech gstann!